

四庫全書

史部

欽定四庫全書

洞霄圖志卷五

宋 鄧牧 撰

人物門

昆山之石不皆美玉而美玉自是而生麗水之沙不皆精金而精金從此而得求駿良駉騏者必之冀野求豫章楠梓者必之晉山誰謂紺髮方瞳鶴骨松貌之士而不由名山出哉昔者廣成子高卧於崆峒庚桑楚尸居

於畏壘三茅上征於句曲兩籙輕舉於武夷夫豈獨其人之卓異如此亦山川之靈發之故我郭許二真君鍊質窮谷飛神層霄後世有志者聞而慕之結荆誅茅成道而去者未易悉數耳目所接不過千百之什一爾其有被褐懷玉自同凡夫湮沒不傳者蓋多也對泉石而遐想凌煙霞而浩歌我輩亦若人爾豈不與之精神皎皎想往來於六合之外哉敘人物第五

列仙

晉

靈曜郭真君

郭文字文舉河內軹人年十三歷華陰山石室中得石
函即神虎內真紫元丹章也後晉室亂乃入餘杭大滌
山伐木倚林苦覆爲舍不置四壁時猛獸害人先生獨
居十餘年無害鹿裘葛巾區種菽麥或採茗以質鹽酪
有餘即施貧人一日有虎張口向之先生視其口有橫
骨乃引手探去明旦虎置一鹿舍外適有獵人來宿因

指與之後虎服役如僕從令負箬隨行常置於鳳凰山側先生負藥歸晚虎嘯今名其地嘯亭時餘杭令顧公颺與葛洪共造其舍攜與俱歸贈以韋袴褶一具不受手植三松與虎游息樹下王導聞其名遣人迎之不馭舟車荷擔徒行導置之西園朝士咸徃觀焉頽然箕踞傍若無人溫嶠問曰人皆有六親相娛先生棄之何樂曰本行學道不謂遭世亂欲歸無路爾又曰饑思食壯思室自然之理先生獨無情乎曰思由憶生不憶故無

情又問先生獨居窮山死爲烏鳶所食奈何曰埋藏者
食於螻蟻復何異又問猛獸害人先生獨不畏耶曰人
無害獸心則獸亦不害人又問世不寧則身少安先生
不出濟世乎曰非野人之所能知也後復逃歸吳地記
載先生嘗坎木書之上曰金雄記下曰金雌記蓋識晉
祚也餘杭圖經云檢先生區種處尚在坎木處有泉亦
稍湮塞梁乾化三年七月封靈曜真君今臨安冲虛宮
武康郭林餘杭天真仙洞亦各有遺迹

贊曰典午雲擾之人入山苦覆一室豈云求安箕踞
西園在朝聚觀尚役猛虎何畏達官葛翁忘言溫生
慚顏千古大滌山空月寒

歸一許真君

許邁字叔玄一名暎後改名玄字遠游七世祖肇後漢
安帝時爲光祿勳永初中大饑人相食肇救活四百八
人永建元年拜司徒子訓孫相並爲三公至神仙者八
人先生與旌陽令遜護軍長史穆皆再從兄弟早與王

右軍父子周旋及楊羲和真人結神明之交永和二年
入臨安西山登巖茹芝渺然自得終焉之志即今大
滌也嘗謂餘杭山是洞庭西門潛通五嶽與右軍書曰
自山陰至臨安多有金堂玉室仙人芝草左元放之徒
漢末諸得道者在焉後於山中師王世隆著詩十二首
論神仙事初以書棄妻即孫驃騎之女妻有書答之載
丹臺錄中其後妻亦入山得道先生四十八於大滌中
峯丹成天降玉童白鹿下迎而去垂語弟子云吾有丹

一劑藏山中無骨箸下異日有緣者得之梁乾化三年
封歸一真君今有昇天壇在中峯宋政和間猶有卿雲
簫吹往來

贊曰陰德育德篤生真材結神明交葆毓聖胎十載
天壇功圓道賅不有帝鄉吾何歸哉白鹿無迹金丹
久埋隱隱簫吹卿雲往來

唐

潘先生

先生不知何許人亦不詳其名字遍游山川愛天柱止焉自郭許二君仙去泉石荒蕪元封古壇亦且湮沒先生慨然發憤請諸朝唐高宗夙聞其名爲勅創天柱觀仍以四維之中壁封千步禁斷樵採爲長生之林錢武肅碑略載其事蓋漢武建壇後歷年雖久不過名山而已至先生乃建爲宮觀傳道至今非所謂真師者哉後於曹橋福業觀成道事見雲笈

贊曰元封建壇不可復稽晉人遺迹煙草離離先生

得道志尋幽棲一旦金碧照映山溪名林長生樵採
莫窺登覽嘗慨神游何之

葉天師

葉法善字道元括蒼人三世爲道士身長九尺能厭劾
百鬼卜居本州卯酉山有巨石橫道行者紆逕避之遂
投以神符石自起高宗召入問道時睿宗明皇紀年廟
號已先知之先天中拜鴻臚卿員外置封越國公舍景
龍觀僚庶受籙者不可勝數開元中與明皇於中秋夜

共游月宮還過潞州取玉笛請上奏一曲仍投金錢城中越旬日潞州奏中秋夜有天樂臨城兼獲金錢以進年一百有七歲後羽化葬於松陽百官縞素送之初天師得道來游天柱適錢塘江有巨蜃溺舟經涉者苦之青山鎮長沈愈來迎於是往焉時潮信未至投丹篆江際戮之以鐵簡鎮於江心遂絕其患至今舟楫無虞皆受賜天師也已而回山平居二十餘載嘗役鬼神建講堂觀門外聽法者雲集有仙花靈鶴之祥載古跡門

贊曰神道設教受知明皇入覲顧問出從翱翔高高
月宮不見漁陽人謀何及夫數適當夜半鬼工山中
講堂遺迹已化茲人不亡

吳天師

吳筠字貞節華陰人祖玄舉孝廉父元亨峽州刺史先
生通經誼美文詞舉進士不中性高介不能與時俯仰
天寶初召至京師明皇與語甚悅自請隸道士乃入嵩
山依潘師正究其術與李白於高天師壇參受上清畢

法初所與帝言皆名教世務帝問其道對曰深於道者
無如老子五千文復問神仙治鍊對曰此野人事積歲
月求之非人主宜留意求還嵩山及復過江而漁陽兵
起識者以爲知幾後居餘杭天柱山精思有感行教於
江漢其文章與李白相上下凡四百五十卷禮部侍郎
權德輿集爲序大厯十三年於宣城道觀焚香尸解弟
子邵翼元奉喪歸葬於天柱山西麓私謚宗玄先生初
天師嘗語其徒云我死當遷神於天柱石室蓋太上俾

我鍊蛻之處故從之女冠王真一亦先生弟子纔十餘
歲即絕粒誦黃庭經天寶間於天柱山得道今先生有
天柱觀碣留山中

贊曰貞節深悟道德五千漁陽騁兵知幾超先飛舄
南渡煙塵漲天勞我華陰息我于宣巖巖石室書劍
藏焉與誰同調錦袍謫仙

司馬天師

司馬承禎字子微號白雲子河內溫人也晉宣帝弟太

常璩之後唐襄州刺史仁最之子居天台山事師正潘
先生傳辟穀導引術無不通後與陳子昂盧藏用宋之
問王維孟浩然王適畢構李白賀知章為方外十友睿
宗召之延問其術對曰為道日損損之又損以至於無
為夫心目所知見每損之尚不能已況攻乎異端而增
知慮哉帝曰治身則爾治國若何對曰國猶身也故游
心於淡合氣於漠順物自然而無私焉而天下治矣帝
嗟嘆久之乞還山賜寶琴霞帔公卿賦詩送之常侍徐

彥博總而爲序曰白雲記盧藏用早隱終南山後登朝見先生將還指終南曰此中大有佳處何必天台對日以僕觀之仕宦之捷徑爾藏用有慚色明皇召入內殿問以道多秘不傳女真謝自然沉海欲詣蓬萊求師至一山見道士謂曰天台司馬承禎名在丹臺身居赤城真良師也自然遂還求之得度冲舉一旦謂弟子曰吾於玉霄峯東望蓬萊常有真仙降駕今爲青童君所召須往矣俄頃蛻去詔贈銀青光祿大夫謚貞一先生帝

親爲製碑韋渠牟作傳文集行於世初天師常往來天
柱山故錢氏碑曰被褐幽人據梧高士挹澄泉之味息
青蘿之陰葉天師法善朱法師君緒吳天師筠暨天師
齊物司馬天師承禎夏侯天師子雲皆棲神物表繼踵
雲根出爲帝王之師歸作神仙之侶

贊曰晉室神胄寄身赤城霞帔辭顯丹臺著名播以
聲詩有唐公卿東望蓬萊列仙降迎女真氏謝聞道
服膺一日乘雲渺焉上征

夏侯天師

夏侯子雲不詳其字從我眉山來年二十狀貌甚古投
司馬天師門下夙興夜寐勤侍巾盥凡十數年未嘗一
日怠缺與物無競不屑世務其師愛之如子及師羽化
乃於大滌山中築藥圃種芝朮之屬嘗言古聖人以上
藥養神中藥養性下藥遣病可使人神靈可使人性明
可使人病愈有藥圃詩云綠葉紅英遍仙經自討論偶
移岩畔菊勸斷白雲根好作詩輒棄其稿故罕有傳者

或縱神游目熙熙自得歸院則掩戶經日寂無所聞有
隣院道士窺見一草衣人同坐亦瞑目不語至暮啓關
伺之則無所見天復中乘異獸歸隱東峯不知所在
贊曰司馬之門入室者希我眉山狀貌魁竒頰甲
紺茅黃精紫芝采采餘閒臨流詠詩異獸可馭東峯
何之千古莫識誰爲草衣

朱法師

朱君緒字法滿餘杭縣人年十八入道居玉清觀閉戶

下帷終日燕坐而已後以玉清地迫喧囂不可久處乃拂衣入天柱山數年道成一日微疾倏起命水澡浴具冠褐焚香端坐暨齊物朱韜光等知當羽化跪泣而辭師曰吾於彭殤存亡齊之久矣悲忻顧戀何有於其間哉然道妙寂寂感者通焉神理冥冥契者昭焉吾言之矣汝知之矣言訖而逝時開元八年五月二十九日也贊曰道妙寂寂神理冥冥心曉所悟下帷玉清晚入天柱積年道成談笑觀化身如羽輕奚悲殤子奚羨

老彭萬古一電誰爲死生

暨天師

暨齊物字子虛師玉清觀朱法師君緒受法錄神符秘
方救物不怠後隨入大滌山精思院初垂象樓三間又
名書樓積書數千卷其上日以著述爲事每講貫玄學
聽者歎服錢氏賜度弟子對曰樂靜久矣不願有之王
曰師必鬼神侍衛凡徒何爲哉所居室壁東西各置一
竅採煉日月光華每語人云吾將復往羅浮石樓矣一

旦不知所之

贊曰精思古院強學不息書樓插天萬卷委積罷書
何爲飲月漱日面腴玉華腹果金液神游八表不假
羽翼羅浮石樓一往無迹

閻丘玄同先生

閻丘方遠字大方舒州人生州之天柱山下二十九歲
師香林左元澤既得道已乃遍尋名山至餘杭天柱異
而止焉蓋餘杭與舒州咸有天柱山傳記所載天有八

柱者也錢武肅王師事之號立同先生唐景福二年爲
築上清壇榜草堂每三元開受法錄乾寧二年與先生
相度地理改觀基爲甲向營建一新表奏其道業於朝
昭宗累詔不起乃就加命服賜號妙有大師光化三年
親製觀記稱先生朝修虔懇科戒精嚴實紫府之表儀
乃清都之輔弼加以降神之地即舒州之天柱山也身
生天柱之前徃修天柱之下察其符契信不徒然蓋撫
薦章語天復二年二月十四日沐浴焚香端坐返真顏

色不變有異香三日方散是夜武肅王夢先生騎鶴訪別明日訃至及就壙但空棺而已後有人見於廬阜自言我捨大滌歸隱瀟山天柱源也先是太平青領書自漢于真人傳授卷帙浩繁複文隱秘先生鈔爲二十卷文約旨博學者便之弟子夏隱言等十人受思真鍊神之旨今道院僅十八齋而派出先生者十有四焉

贊曰降神古舒得道餘杭兩柱擎天千里相望殊庭翼翼命服煌煌鶴背永訣狸首空藏先生曷歸匡廬

阻長厥有神孫百世彌昌

鄭冲素先生

鄭元章字博文幼號神童十五歲辭親學道依真系大師李歸李特爲建星壇授上清畢法精修不倦景福二年與玄同先生同居天柱山精思院武肅王因命入開元宮啓建壇錄門下受度弟子一百三十餘人王表奏朝廷云啓建日有彩雲臨壇仙鶴五百餘隻旋繞空中昭宗賜紫衣號正一大師冲素先生累乞歸山王親駕

送於郊外至精思院旬日間忽沐浴端坐語門人曰今
洞庭使者在此迎吾吾當去矣汝等精勤戒行勿為諸
惡脩然而逝體柔如生享年六十有八王命府官縞素
葬於本山

贊曰唐武肅王貫德尊道師贊閭丘肆闡玄教靈鶴
回翔綵雲縹緲紫衣䟽榮正一昇號星壇甫撤洞庭
已召勒名豐碑泉石有耀

宋

常先生

常中行錢塘人師河南馮德之形貌奇偉落魄不拘檢
好飲酒及音律篋無留金所有一簫一笛而已常曰陰
符經有強兵戰勝之道非外事也亂吾真者不能入即
戰勝爾多往來餘杭浣坎得錢悉市酒有趙道人啖瓦
礫如餅餌先生一見愛之引入卧內對飲達旦每醉則
袒肩曰皮如鐵肉如石皆從修養得治平四年六月語
弟子沈日益曰吾不久居此偃卧俄頃起曰嗟乎吾未

能出即於几案間設鑑一水盂一時時取視之神色怡然越三日而逝葬天柱峯下明年正月往杭州見故人胡達夫值不在留刺而去胡他日聞先生解化亟求其刺已失所在是歲遠日或芟壙草見兩竅墜啓驚請衆觀之探以杖空空如也歲餘其徒有邂逅於茅山者

贊曰忘情杯觴寄興音律強兵戰勝厥有奇術隱几懸解對鏡神出馬鬣無恙鶴形已失逢人句曲不異平日何年吹簫重過石室

喻冲和先生

喻天時字齊仲號蟾華子自幼肄業洞霄政和間以詩
科試中選精天文歷數識緯醫藥之學至驅雷召雨旋
著靈異宣和間勅住信陽軍神霄萬壽宮朝廷屢遣使
降香祈禱有感賜號冲和先生淳熙三年之徽州太守
沈君禮遇之一日別太守云上天召我朝廷亦召我且
赴上天召也第去之日疾雷大雨毋恐居旬日信然太
守具其狀上聞而朝廷果欲召之且遣使矣先是嘗語

其徒曰我死歸雷部爲仙君治世間不平事是時以雷雨爲驗其徒奉喪歸藏於大滌山棲真洞側

贊曰齊仲博學聞名政和黃冠入試以詩擢科坐檄雷雨不煩撓呵中使函香屢至巖阿宣室耿耿玉樓
峩峩回顧下土不平謂何

陸石室先生

陸維之字永仲一名凝字子才餘杭人少以計偕入汴
道遇異人謂曰秀才難望科第不如還山贈以丹一粒

且戒俟緩急用之及下第歸舟循汴河風激浪怒且將
覆追憶前語以丹投之風浪始息河上有呼其姓名者
則所遇異人也自是有超世之志隱於大滌山之石室
人因以石室稱之逍遙林谷詩酒自娛嘗觀潮錢塘有
酹江月詞云遠山一帶遡晴空極目天涯浮白楓落鴉
翻談笑處不覺雲濤橫席酒病方蘇睡魔猶殢一掃無
留迹吳帆越棹恍然飛上空碧長記草賦梁園凌雲筆
勢倒三江秋色對此驚心空悵望老作紅塵間客別浦

煙平小樓人散回首千波寂西風歸路爲君重噴霜笛
高宗嘉賞欲召見辭疾不赴及上退處北宮嘗幸大滌
憲聖亦偕行上問山中詩客或以維之對進其行卷上
讀數首太息曰布衣入翰林可也欲歸與孝宗言之憲
聖曰山林隱士必不求名強之出山乃大勞苦遂止未
幾以疾卒太博關注子東贈先生詞序云吾鄉陸永仲
博學高才自其少時有聲場屋今棲白鹿洞下絕葷酒
屏世事自放塵埃之外行將六十而有嬰兒之色非得

道者能如是乎乃作水調歌頭一闋詞云鳳舞龍蟠處
王室與金堂平生想望真境依約在何方誰信許君丹
竈便與吳君遺劍只在洞天傍若要安心地須是遠名
場幾年來開林麓建山房安眠飽飯清坐無事可思量
洗盡人間憂患看盡仙家風月和氣滿清揚一笑塵埃
外雲水遠相忘先生嘗進百論有石室小隱集三卷臨
終了然書一詩云岳南之館白雲端鳳笛龍簫徹廣寒
一鶴曉飛冲碧落羣仙笑倚玉闌干

贊曰永仲逍遙觴詠自娛年過六十髮青顏朱金丹
勿餌玉堂勿居空負石室平生著書鳳笛龍簫洋洋
騰虛笑領羣仙薄游帝都

王元素先生

王樸字元素其先北京大名府人避地轉徙至臨安愛
金岫山川之勝因家焉初蜀之青城有方士五結侶東
南游至浙右中一人忽曰吾塵緣猶未斷更當為人子
三紀揖衆別去莫知所之先生父球以積善聞鄉里室

潘氏孕及月一夕夢偉丈夫衣冠甚古跨白鹿入門驚寤而生先生方在襁褓口吻常咿嚶若有所誦人以葷茹啖之輒搖手作麾去狀既長丰神峻整未嘗學詩而觸景吟詠不凡及冠苦不願娶父母呵責不得已受命婚之夕婦至乃從間道出走家人遍索得之野外力挽以歸既得子而婦喪長嘯曰吾責已塞況有三弟可與父母訣矣遂棄家結茅大滌山石室與隱士陸永仲隣居講求修真鍊養之術有間則更唱迭和見者咸謂興

寄飄飄真不食煙火語後歸省親其舍傍有嶺一綫之
蹊臨懸崖千仞往來苦之先生贊其父闢爲夷塗翼以
闌楯以便行者訖工乃歸未幾沐浴趺坐而化年果三
十六永仲遣報其家翼曰父母俱來忽舉首開目微哂
復瞑陸君讚其像曰彭氏之壽顏氏之夭誰得誰失春
花秋草山雲卷舒水月昏曉本自不動彈指中了瘞於
石室之麓有一白鹿呦呦循行塚上忽不見其徒以其
字私謚玄素先生

贊曰青城故人長揖別去積善之家夢已驚寐既償
宿因復遠所怙結交石室究竟龍虎三十六年如旦
斯暮呦呦白鹿空繞獨墓

楊先生

楊廼誠字叔閑潼州人爲州之定光觀道士東游襄漢
荆吳久而息大滌山中形貌頎偉顏如渥丹目光射人
帶索苴布寒暑如一飲酒至斗不醉或終日坐林中無
知者名聞當時高宗居德壽宮召見與語甚悅慈福太

后問道要以師事之爲築室於宮之通明館側又建庵
西湖延祥觀以便往來棲息有旨促召則麻鞋入見淳
熙初力乞西歸越三載旨遣使往唁方見其坐蛻旋具
奏內修黃籙追嚴之命高士何守澄進青章有云仙凡
相遠罔知修短之期道俗雖殊固有師資之禮

贊曰山林高蹈不釣聲名爲帝者師亦何足榮斗酒
一布浩歌徒行鶴歸大滌蟬蛻通明斷夢西湖飛神
南冥青章追慕九重至情

陳寢虛先生

陳君良係南渠人童年得道隱居杭吳山修煉丹成獨
喜天柱每與幽人韻士往來其間常離地三尺懸虛而
卧因號寢虛先生窮冬積雪浴溪澗中畧無寒色自餘
靈異不可殫紀有紫極觀過天柱山詩云道在吾身宇
宙寬朝踰雲岫暮雲關丹靈不服春風轉欲度世人那
得閒

贊曰列子御風先生寢虛風尚有托虛獨安居至人

行世匪血肉軀其中不有外焉取餘人以爲幻我以爲如紛紛談仙勿誑迷愚

朱妙行先生

朱真靜字復常杭臨安人自幼好學丹經玄文一覽輒通其意每春自攜籃入山摘茶有客至掌擎爲供不事茶具真率可想見嘗隨意行經宿忘返諸徒方驚憂忽歸云吾游大滌洞遇道人碧巾黃衣相攜至馴虎巖下坐語移時而已不謂經宿也題壁間曰經書那得語虛無

荆棘林中有坦塗不遇異人真口訣誤人錯下死工夫
一日整冠裳謝同衣遂登石室宴坐垂二十載名聞於
朝遣中使召不起初先生入山猛獸巨蛇屢至左右舉
手麾之悉遯去有病者扣門求救噓氣按摩無弗愈者
淳祐癸卯夏語諸徒曰吾卜中元別此山矣及期書偈
曰去來如一真性湛然風收雲散月在青天趺坐而化
膚瑩眼碧不異生時理宗聞之哀悼賜宸翰特贈妙行
先生

贊曰丹經萬卷讀者茫昧復常一閱意領神會抱玄
石室二十餘載猛虎伏藏巨蛇引退揮偈脫穎趺坐
委蛻青天湛然素月常在

按茲山自晉逮今已千百餘年其間得道仙去甚衆矣
綿歷歲月之久無復可稽茲編所得僅一十八人而已
然又有作者雖未敢遽儕仙列其或事業可稱於時文
章可傳於後亦不敢聽其泯沒因別為高道傳以誌不
朽云

高道

唐

白威儀先生

白元鑒不詳其字西川成都府人高祖君敏武德功臣
父洪演高蹈不襲封娶申屠氏生一子即先生也玄宗
幸蜀時爲威儀道士住上皇觀志在絕俗逍遙遐舉周
覽山川訪前賢高蹈之躅得餘杭天柱觀止焉四十年
矣元和十二載八月解化瘞於天柱山大滌洞東北嘗

有山中十詠

贊曰有志絕俗白公威儀自蜀來南山棲遲玄酒
味淡大音聲希積四十年無人見知山中遺老傳誦
十詩適興而已不矜能之

宋

馮先生

馮德之字幾道河南人少習儒業書無不讀京師號馮
萬卷不慕聲利棄家入道被旨住杭州洞霄宮時公卿

皆以詩餞行宋真宗銳意玄教盡以秘閣道書出降餘
杭郡俾知郡戚綸漕使陳堯佐選先生及冲素大師朱
益謙等修校成藏以進號雲笈七籤初詩人潘閬與先
生爲道義交任泗州參軍卒先生囊其骨歸葬天柱山
錢易銘潘墓具載其事

贊曰幾道一諾生死不負相與逍遙道交有故不遠
千里歸骨天柱宮牆西偏突兀潘墓幾年雲笈修善
校誤學仙志士讀者玄悟

唐先生

唐君名子霞未詳其字宋政和間入道洞霄宮性嗜讀書尤長著述謂大滌洞天歷千五六百年其間幽人勝士高行危言不得有傳於世私切痛之乃著書名大滌洞天真境錄其自序曰大哉五嶽爲天下之鎮自餘山川籍其名者洞天福地爾蓋真仙所宅靈氣自生昭然若雲從龍風從虎使其居者神清性悟而虛無有歸實玄風之可鄉也杭則餘杭縣西一十八里有天柱山宮

曰洞霄者自漢武帝志崇道學立爲真靖之場修生高
士靡不棲遲於此宮有五洞交局九峯迴挹千崖萬谷
秀聚其中泉飛彤履之簷雲鎖碧壇之角祥光雲湧嘉
木返於春枝撫掌泉靈神丹藏於翠箬誠姑射之令壤
歟由是聲流方外恨不能泠然御風引千里於頃刻爾
蓋雖朝士大夫駿馭之游亦未得探其異迹於戲勝槩
千百年來終乏采錄無以發其蘊奧又安得目擊而足
履之哉僕非其人濫居林下或聞一水一石欣然親往

銘在心目今既得矣匪敢自私遂覈成卷帙雖不足進之作者庶爲尋幽之一鑑爾時政和壬辰十一月望日序後遠游莫知所終

贊曰大滌名山歷載二千問其故實荒草斷煙先生發憤搜討成編後來遺逸藉茲有傳孰爲富貴孰爲神仙自古文章如日行天

石正素先生

石自方字元矩饒州鄱陽人師冲寂大師孔守容爲道

士長七尺餘龐眉秀髯大耳高顴音聲如鐘莊靜淡泊
有深沉之思經史百氏無不通尤嗜莊列書眉山陸維
忠授丹訣往來西山廬阜與方外隱逸以琴酒自適嘗
自號渾淪道人時虛靜天師作庵於龍虎戲珠峯先生
至即下榻榜曰渾淪庵虛靜被召拉先生偕行居無何
返故廬朝廷方求巖穴奇士部使者以先生聞強起至
京師徽宗幸寶錄宮講所先生在焉上望見儀狀魁偉
召前問從何來對曰草野臣無他技能江東使者以臣

應詔即日授金壇郎主杭州洞霄蓋宣和元年冬也明年七月至宮四方學道者翕然從之冬十月盜起嚴徽間明年正月破臨安縣官吏散走其徒亦治舟請行先生曰吾被天子命主此宮守死吾職也公等第去已而賊至先生正色叱之遂遇害門人程用光叩闥言死事狀上閱其忠賻錢三十萬贈正素大夫制書云勅故金壇郎石自方頃者盜嘯浙東侵犯隣壤而居官任職者往往驚遁爾典司真館秉志不回叱罵兇徒遂至蹈難

賜頒賻賚超進道階非獨勸死節者之榮而亦爲偷生者之愧時東南死事者才三數人士大夫以此高之平生有詩文數百篇以先生死節洞霄號石洞霄曲肱先生熊彥詩作石洞霄傳

贊曰舍生取義名教所美山林間人不望此宣和東南嘯聚蠭起望風逃遁守土猶爾元矩正色罵賊以死璽書褒嘉永耀青史

葉靈一先生

葉彥球錢塘人崇寧間受度尋師方外溯長江上荆漢
浮沅湘訪天師遺跡南游吳越過閩廣徘徊羅浮以歸
遂走京師寓寶籙宮復還洞霄由是銳意教法飛章走
檄禍福之驗聳動當世至安吉之烏鎮鎮南有地爽塏
乃卜居焉以符水爲民禳禱疾無不愈鄉人敬信冠履
雲集經營之初富者出財貧者出力故宮殿廊廡金碧
煥爛賜額曰崇福宮先生兩領洞霄晚益精勵賜號虛
靜靈一大師於蛻龍洞之傍築室老焉天台虞公似良

榜曰歸雲壽八十四無疾而終

贊曰遠行求師足半四方飛章籲天休咎立彰冠履
襍還金碧焜煌至今殊庭福庇一鄉築室終老蛟龍
洞傍誰榜歸雲虞公似良

何冲靖先生

何士昭餘杭人自幼有修真志師上清大洞道士胡處
邦受度戒行精勤數學不倦凡慕道者悉歸焉政和間
被旨典宮事親詣京師奏請蒙賜度牒三百道令本路

漕臣應辦工役一新宮宇道侶雲集號爲全盛重和元年十二月五日召其徒告曰吾歸矣弟子環侍至夜半方就榻聞異香盈室亟視已趺坐而逝時境內往往聞鐘聲後二日探囊得一紙書頌云五十年住人世靈臺不染纖瑕壬午三更子時天開萬里無霞蓋是日壬午也賜號冲靖大師

贊曰冲靖居山戶外履滿乃奉綸書聿新琳館午夜鐘聲回薄天半四筵涕泗九重歎惋錦囊遺頌去住

懸斷彼哉塵人疾病則亂

李明素先生

李洞神字雲友杭之新城人自幼不如輩酒嗜黃老學
七歲入洞霄受度刻意道法戒行嚴潔中年走淮海謁
徐神翁密有所得歸屏人事宴坐林下高宗賜號明素
俾主寧壽觀未幾乞還山授右街道錄主洞霄宮孝宗
踐位召使拜章旋即昭格乾道九年正月晦日草別書
遺同道偃然而寂嘉興錢公敘其行業刊於遺像有云

周流六虛去來自若死而不亡先生有之贊曰去知而
愚性含太初視有若無心包太虛生而神悟密契道樞
死而神在起頌遺書

贊曰設行浮辭坐掩當世而不容僞生死之際明素
遺形如脫敝屣歷歷別書遍告同志兩朝寵遇一枕
夢寐獨與神翁徜徉天地

陳汝和先生

陳希聲字震甫臨安人師凝妙大師金致一以行業清

高際遇高宗授右街鑒義俾主洞霄宮提綱嚴肅獎拔
後進一時學者向風乾道二年三月車駕臨幸山中扈
從登游東西巖洞賜御書度牒號凝和大師又書度人
經賜焉淳熙三年九月談笑而寂壽六十有九

贊曰昔宋高皇駕幸名山希聲從游東西兩巖從容
談立喜動天顏御書道經照耀人寰鼎湖既遠華表
不還惟有喬木曾聞珮環

徐棲霞先生

徐冲淵字叔靜姑蘇人自號棲霞子嘗浪迹江湖間淳熙中被召居太一宮高士齋已而奉詔典洞霄通明館久之會孝宗居重華宮召寘佑聖觀凝神齋嘗奉命和御製秋懷詩二篇詩云東壁星辰爛不收夜涼河漢截天流芙蓉院靜琴三疊翡翠簾開月一鉤黃屋非心辭大寶碧雲有意思高秋金聲玉振掩前作漢祖空懷猛士憂天末虹蜺晚未收龍池新雨漲清流鷗綠適意頻依渚魚不貪香懶上鉤賸喜三邊無警報况當萬寶得

成秋嘯歌高蹈羲皇上不復深貽海內憂又令進西游
詩表云臣伏以頃歲蒙恩薄技已塵於淵鑒邇辰奉詔
陳言尚簡於帝心深慚瓦釜之鳴疊溷黃鍾之奏伏念
臣知識椎鈍質性卑昏哦松愧處士之風夢草乏騷人
之思綠蓑青蒟徬徉雲水之煙波破帽蹇驢潦倒灞橋
之風雪自是結繩樞之手初非聯石鼎之才敢期誤徹
於聽聰遂使叨承於顧問茲蓋伏遇陛下篤實光輝日
新其德聰明睿知足以有臨學問淵源決汝漢而排淮

泗文章鼓吹動天地而感鬼神創百世之規模冠四始
之風雅以臣么麼逢辰休明雖聖度謙冲博采芻蕘之
論而天威咫尺妄干斧鉞之誅拜手陳詞俯躬待罪臣
所有西游集雜詩類成兩編謹昧死隨表上進以聞上
覽之謂侍臣曰近世士大夫詩有不及者時豫章玉隆
觀主席方虛高士謝守顥荐於郡即日具禮走京師迎
之居歲餘假化朝奉郎府倅丘公探搜其詩數百篇刻
觀中號經進西游集

贊曰嗟嘆文章與時窮通棲霞以詩顯淳熙中西游
兩編上聞四聰當饋嘉歎有古人風雪案風檠斧鑿
心胷不入里耳永慚秋蟲

俞怡然先生

俞延禧字德厚臨安人受度於洞霄宮自號竹林道人
襟韻洒落善丹青高宗賜御衣象簡遷授道秩後以古
澗松進孝宗御製詩賜曰犖确奔流瀉玉虹凜然雲幹
擬蟠空紅塵車馬稠如織夢入蒼煙萬壑風嘗自寫神

恩平郡王見之賜讚曰日角月淵天賜怡然丹青妙筆
秉鑑自傳妙中之妙玄中之玄不知誰氏子乃玉京之
謫仙孝宗又賜以怡然二字俾主寧壽觀未幾乞還山
復俾知洞霄宮隨亦退閒住通明館脩然棊局間話以
自養淳熙十四年二月十五日與道侶對棊拈子稱好
著而化高士徐冲淵弔云千里雲煙三尺畫百年生死
一枰棊

贊曰竹林道人蚤歲善畫際遇兩朝馳譽天下蒼煙

萬壑千古無價進非奔競退亦瀟洒晚寄棋枰坐遣
餘暇一子欲落稱賞而化

王純素先生

王思明號竹庵臨安人爲王冲素弟子性嗜書編錄滿
案餘閒寄興風雅與龔冲妙章清隱潘怡雲結山中吟
社當世重之寧宗慶元間賜純素大師同領宮事放翁
陸公游喜與交爲撰洞霄宮碑謝別放翁詩云還丹一
粒如粟大點鐵成金金不壞服之冲舉騎蒼龍直上九

霄觀世界君藏此藥天下知鬼神正眼那得窺歸磨蒼
石寶君施文章與此元無異真跡尚在壽七十餘卒有
竹庵詩稿棲真洞神光記

贊曰茲山文章遠者莫稽近世具體放翁一碑先生
力請久乃得之觀所與交其人可知手抄千卷劫火
灰飛有可傳者竹庵集詩

龔冲妙先生

龔大明字若晦仁和人七歲讀書一再過輒成誦其家

與洞霄胡先生志行族相隣先生省親竒之引歸度爲
弟子弱冠遇異人得修煉旨神采秀發積三十餘年升
山中主席力辭弗獲強起應緣者四十年自宴坐外以
吟詠自適有南軒稿平淡清逸可觀先是山中留題至
多久皆散滅至君始裒爲集併刻洞天真境錄寧宗聞
其名召至禁中齋修感格及丐歸上曰卿居洞天與此
間孰勝對曰陛下居天上洞天臣不過人間洞天爾安
可相方然人身自有洞天神明居之貴賤一理存存於

中不爲外邪客氣所據則道同仙聖足以無愧於洞天
之居上稱善賜紫衣賜號冲妙大師遺金幣甚厚還山
建法堂復賜書演教堂扁理宗朝以國事擾攘遣內臣
劉世亨等諭旨欲鑄鐘以卜休咎費金五十兩白金五
百五十兩令合精銅爲之一鼓而就發音清越詔降內
帑設普天醮謝恩併鐘樓改作由是宮宇一新嘉熙丁
酉秋語其徒曰吾住山緣事畢矣遂掩關不問世事宴
坐累月明年仲春扶杖出山徧詣親舊若告別者歸經

夕而逝容貌如生壽七十有一

贊曰天柱名山騷士必至古詩存者千不一二先生
采錄刻板行世自茲題詠罔有失墜惜哉生晚不及
唐季勿問厥餘斯已奇事

孫靈濟先生

孫處道字元素餘杭人穎異肥皙總角有出塵志嘗夢
幢節迎導入大宮闕主者勞問殷勤若有囑付未幾隨
父入天柱山指樓閣曰此正疇昔夢見者師冲妙先生

嘆曰天意昌吾大滌使爾來耶長通老列莊書精琴碁嗜丹青序升主席賜號靈濟通真大師歷二十七年以常產素薄請於朝理宗賜度牒買田陽羨築塘立圩不數月集事又賜璉川田以益之爲書洞天福地四字仍賜書清靜經一卷至今冠裳雲集供給不匱皆其力也平日與朱復常談論相契復常既得道尸解君以行實奏聞得贈妙行先生景定甲子彗星見東南每夜起觀咨嗟謂左右曰應在今冬吾不及見矣七月十七日召

徒衆戒飭特異常日俄頃整衣冠端坐而逝年六十有
二是歲冬理宗升遐其言悉驗

贊曰元素蚤年夢游勝地來見洞天宮闕不異惡知
一夢非真造詣二十七年非真夢寐我田既闢我庾
不匱後人安居毋忽所自


貝徐二先生

貝大欽號懶雲餘杭人入道洞霄住山三十年延納雲
水日親視厨饌無闕典得陳季卿故址建洞晨觀修黃

錄普度餘萬名自邑至宮十八里道路崎嶇行者以爲
病君捐資買石甃爲夷塗理宗賜號靈一大師逮龐眉
皓首徜徉泉石間如神仙中人壽八十六而終其徒徐
應庚亦餘杭人好學日抄夜誦卒成才同衣稱徐白眉
贊貝君甃路親董工役不避寒暑增土築塘架石爲梁
夾路樹林木閱五年成亦解化壽五十餘自景定至今
四十餘年行者如在圖畫其師弟子之功不可沒也

贊曰天柱入邑十有八里道路嶮嶇行者病矣孰能

夷之君師弟子五載成功千功如砥洞晨瓢笠來者
如水後人勉旃勿怠初志



洞霄圖志卷五

欽定四庫全書

史部

洞霄圖志卷六

詳校官太僕寺少卿臣李廷欽

編修臣程嘉謨覆勘

總校官進士臣朱鈐

校對官中書臣秦泉

膳錄監生臣朱衣

欽定四庫全書

洞霄圖志卷六

碑記門

天柱觀記

天柱觀者因山為名按傳記所載皆云天有八柱其三在中
國一在舒州二在壽陽洎今在餘杭者皆是也又按道經云
天壤之內有十八洞天三十六小洞天如國家之有藩府郡

宋 鄧牧 撰

縣通相稟屬其洞天之內自有日月分精金堂玉室仙官主領
考校災祥今天柱山即真誥所謂大滌洞天者也內有隧道暗
通華陽林屋皆乘風馭景倏往忽來真蹤杳冥非世俗所測而
況大江之南地兼吳越其峯巒西接兩天眼之龍源次連石鏡
之嵐岫東枕浙江之迢派可謂水清山秀兼通大海及諸國往
還此外又有東天目西天目及天竺之號得非抗蒼涯於穹昊
聳層碧於雲霄立天為名以標奇特耶若乃登高遠望則千巖
萬壑金碧堆疊龍蟠虎踞靈粹滋孕代生異人非山秀地靈之

所鍾襲其孰能與於此乎就中天柱風清氣和土腴泉潔神蛇
不螫猛獸能馴自漢武帝酷好神仙標顯靈跡乃於洞口建立
宮壇歷代祈禳悉在此處東晉有郭文舉先生得飛化之道隱
居此山羣虎來柔史籍具在乃於蝸廬之次手植三松虬偃鳳
翹蒼翠千載今殿前者是也洎大唐創業以玄元皇帝為祖宗
崇尚玄風恢張道本天皇大帝握圖御宇授錄探符則有潘先
生弘演真源搜訪神境弘道元年奉勅創置天柱觀焉仍以四
維之中壁封千步禁彼樵採為長生之林中宗皇帝玉葉繼昌

玄闕愈闢特賜觀莊一所以給香燈於是臺殿乃似匪人工
廊檻而皆疑化出星壇月砌具體而微則有被褐幽人據
梧高士挹澄泉之味息素蘿之陰葉天師法善朱法師君
緒吳天師筠暨天師齊物司馬天師承禎夏侯天師子雲
皆繼踵雲根棲神物表骨騰金鎖名冠瑤編出為帝王之
師歸作神仙之侶金錯標字翠珉流芳昭晰具存不俟詳
錄其餘三泉合派雙石開扉藥圃新池古壇書閣各有題
品足為耿光鏐今際蒙聖朝疊委藩閫綰闔閭之封畧統

勾踐之山河寵極蕭曹榮兼渾郭緬懷斯地實邇維桑
素仰真風備詳前事但以此觀初置之始本對南方後
有朱法師相度地形改爲北向雖依山勢偏側洞門其
洞首陰背陽作道宮而不可致左右崗壠與地勢以相
違背洞門而不順百靈使清泉却侵白虎致使觀中寥
落難駐賢能皆爲尊殿背水激衝之所致也乾寧二年
鏐因歷覽山源周遊洞府思報列聖九重之至德兼立
三軍百姓之福庭於是齋醮之餘徧尋地理觀其尊殿

基勢全無起發之由致道流困窮二時而不辦香燈竟
歲而全無醮閱遂抗直表上聞聖聰請上清道士閻丘
方遠與道衆三十餘人主張教跡每年春秋四季爲國
焚修鏐特與創建殿堂兼移基址山勢有三峯兩乳兼
許邁先生丹竈遺跡猶存遂乃添低作平減高爲下改
爲甲向是五音第一之方而乃添培乳山却爲主案尋
即一二年內法主兩霑渥恩道侶益臻常住咸備青牛
白鹿堪眠琪樹之陰絳節霓幢不絕星壇之上得不因

移山勢而再振玄風者哉尋又續發荐章奏閭丘君道
業聖上以仙源演慶真派流輝方瑤水以遊神復華胥
而入夢欲闡無爲之教欣聞有道之人勅賜法號爲妙
有大師兼加命服雖寒棲帶索之士不尚寵榮在法橋
勸善之門何妨顯赫其次畢法道士鄭茂章生自神州
久棲名嶽玄機契合負笈俱來鏐幸揖方瞳常留化竹
副妙有大師三元八節齋醮同修福既薦於宗祧惠頗
霑於軍俗尋發特表蒙鴻恩繼賜紫金焚修於此其大

殿之內望天尊真人龍虎二君侍衛無闕其次別砌上清精思院爲朝真念道之方建堂厨乃陳鼎擊鐘之所門廊房砌無不更新天風每觸於庭除地籟時聞於牕戶兼爲親蹤觀額以炫成功非矜八體之能貴立永年之志妙有大師閭丘君靈芝異稟皓鶴標奇誕德星躔披霓靈洞朝修虔懇科戒精嚴實紫府之表儀乃清都之輔弼加以降神之地即舒州之天柱山也遊方有志躡屩忘疲自生天柱之前駐修天柱之下察其符契信

不徒然乃此修崇實同搜抉所謂道無不在代有其人爰自開基至於功畢備仙家之勝槩暢聖祖之真風遂錄畫圖封章上進奉光化二年十一月二十七日詔旨勅錢鏐省所奏進重修建天柱觀圖一面事具悉我國家襲慶仙源遊神道域普天之下靈跡甚多然自兵革洊興基址多毀況茲幽邃豈暇修營卿考一境圖經知列聖崇奉親臨勝槩重葺仙居仍選精慤之流虔備焚修之禮冀承玄貺來祐昌期豈唯觀好事之方抑亦驗

愛君之節既陳章奏披玩再三嘉嘆無已想宜知悉冬
寒卿比平安好遣書指不多及懿夫地出靈阜天開洞
宮三皇之前真聖非一莫匪乘虛躡景出有入無雖或
掛於傳聞不可知其名氏皆分洞天而理即大滌居其
一焉天柱觀晉漢已來迄於唐室修真之士繼躡清塵
當四方倣擾之時見一境希夷之趣今也仙宮嶽立高
道雲屯六時而鐘磬無虛八節之修齋罔闕有以保國
家之景祚福兩府之蒸黎鏐今統吳越之山河官超極

品上奉宗社次及軍民莫不虔仰神靈遵行大道時也
聖明當代四海皈依泰蒙委以東南封功臣兼頒金券
家山衣錦秉兩道之油幢上承一人倚注之恩次乃是
正真護持之力玄元至聖崇敬福生大道真科是無爲
化致乃及身於此合刊貞石用俟後賢時光化三年七
月十五日記定亂安國功臣鎮海鎮東兩軍節度使浙
江東西等道觀察措置營田招討安撫等使兼兩浙鹽
鐵制置發運使開府儀同三司檢校太師兼中書令使

持節都督杭越等州諸軍事兼杭越兩州刺史上柱國
彭城郡王食邑五千戶食實封二百戶錢鏐

天柱觀碣

太史公稱大荒之內名山五千其在中國有五嶽作鎮
羅浮括蒼輦十山爲之佐命其餘不可詳載粵天柱之
號潛霍及此三峯一稱矣蓋以其下擢地紀上承天維
中函洞府之謂豈唯蘊金碧宅靈仙所貴興雲雨潤萬
物也自餘杭郭沂溪十里登陸而南弄潺湲入崢嶸幽

徑窈窕纔越千步忽巖勢却倚襟領環揜而清宮闢焉
於是傍訊有識稽諸實錄乃知昔高士郭文舉創隱於
茲以雲林爲家遂長往不復元和貫於異類猛獸爲之
馴擾晉書逸人傳具紀其事可畧而言自先生悶景潛
昇而遺廟斯立暨我唐弘道元祀因廣仙跡爲天柱之
觀有五洞相鄰得其名者謂之大滌雖寥遠莫測蓋與
林屋華陽密通太帝陰宮耳爰有三泉二軌一濫殊源
合派水旱不易擁爲曲池縈照軒宇夏寒而辨沙礫冬

溫而冒萍藻既漱而飲之曲肱而枕之樂在其中矣土
無沮洳風不飄厲故棲遲者心暢而壽永盤薄紆輿氣
淳境美虎不搏蛇不螫而況於人乎正觀初有許先生
曰邁懷道就閒荐召不起後有道士張整葉法善朱君
緒司馬子微暨齊物夏侯子雲皆爲高流或遊或居窮
年忘返寶應中羣寇蟻聚焚蕪城邑蕩然煨燼唯此獨
存非神靈扶持曷以臻是州牧相里造縣宰范愔化洽
政成不嚴而理遺氓景附復輯其業筠與逸人李玄卿

樂土是安舍此奚適恐將來君子靡昭厥由故覈而志之表此堅石大歷十三年正月十五日中嶽道士吳筠記

厨院新池記

遇知己而用者匪唯於人物亦有之初厨院因前池餘派浸潤坳堂數步及雷纔供厨飪滌器而已邑大夫順陽范愔跡累人羣心在遐曠每休沐之暇訪道山林見其有天造池沼之形而隧爲溝竇乃命黃冠等頤指廣

袁鑿周宇下駢石以涯之畜流以深之清瀾忽平秋陰
滿院執爨無欲清之僕挈瓶無汲深之勞不造機事而
功贍於物范公實所謂新池知己矣靜勝則道淳境幽
則神王予與吳天師采真洞府朝夕窺臨瑩徹心膽滑
昏潛遁事苟愜於心則與登姑蘇望五湖而齊矣故因
碑徇餘地刻石誌之猶詩人有泌泉之作大厯五年歲
號閏茂八月一日處士李玄卿記

宋

洞霄宮碑

造化之初混淪磅礴一氣既分天積氣於上地積塊於
下明爲日月幽爲鬼神聚爲山嶽海瀆散爲萬物萬物
之至靈爲人人之至靈爲聖哲爲仙真而道爲天地萬
物之宗幽明鉅細之統此處羲黃帝老子所以握乾坤
司變化也其書爲易六十四卦道德五千言陰符度人
西昇生神之經列御寇莊周關尹喜之書其學者必謝
去世俗練精積神棲於名山喬嶽畧與吾教弗類而篤

於父子之親君臣之義與堯舜周公孔子遺書無異則
正吾教之大指也臨安府洞霄宮舊名天柱觀在大滌
洞天之下蓋學黃老者之所廬其來久矣至我宋遂與
嵩山崇福獨爲天下宮觀之首以寵輔相大臣之去位
者亦以提舉洞霄超拜左相者則其地望之重殆與昭
應景靈醴泉萬壽太一神霄寶籙爲比他莫敢望在真
宗皇帝時始制詔改宮名賜仁和縣田十有五頃以奉
齋醮悉除其租賦至政和間宮以歷歲久穿壞漫漶徽

宗皇帝降度牒三百命兩浙轉運司復興葺之歲度童子一人爲道士建炎中又廢於兵火高宗皇帝中興大業聞之當宁歎息迺紹興二十五年以皇太后之命建昊天殿鐘經二閣表以崇闕繚以修廡費出慈寧宮梓匠工役具於修內步軍司中使臨護犒賜狎至既不以命有司而山麓之民亦晏然不知有役一旦告成金碧之麗光照林谷鐘磬之作聲摩雲霄見者疑其天降地湧而神運鬼輸也可謂盛矣及上脫屣萬幾頤神物表

遂以乾道二年自德壽宮行幸山中駐蹕累日勅大官進蔬饌親御翰墨書度人經以賜自有天地即有此山殊尤之迹今乃創見慶元六年九月葆光大師宮都監潘三華與知宮事高守中同知宮事水丘居仁以告游曰願有紀以爲無窮之傳游以疾未能屬藁同知宮事王思明及其徒李知柔踵至以請會游被命紬史又不克成嘉泰三年四月史成奏御乃能敘載本末如此且作銘曰在宋祥符帝錫帛書廼作昭應比隆河圖元豐

景靈列聖攸居元祐上清以祝帝儲秘宇煌煌煥於天
衢徽祖神霄誕彌九區迨我高皇省方東吳睠言天柱
鎮茲行都警蹕來臨神明翊扶乃御幄殿穆清齋居天
日覆照雨露涵濡迄今遺民泣望屬車三聖嗣興光照
聖謨千礎之宮騫騰太虛傑閣鴻鐘震於江湖肆作誦
詩億載不渝中大夫充寶謨閣待制提舉佑神觀兼同
修國史實錄院同修撰兼祕書監陸游撰并書丹題額
開禧元年歲在乙丑四月望日同知宮事王思明知宮

事水丘居仁住持都監通明殿焚修高守中立石

洪鐘記

聖天子握符御極敬天愛民遇雨暘稍愆禱於羣望所
至感格其靈績最彰者則杭之大滌也是山居洞天三
十有四爲天柱福地距行都三舍御前崇奉有年矣宮
宇宏壯獨闕巨鐘使命絡繹奏聞上思所以揭虔表靈
廼紹定己丑病月丁亥有旨命鑄仲秋己未告成夫山
川流峙雲氣出沒明神所以代化工而施利澤也竄棟

橫空鴻音徹漢聖天子所以鎮名山而昭丕貺也神有
顯功上有庠報此殊庭盛事可無紀乎載攷圖籍唐大
厯中有神應鐘台之黃巖因禱旱醻德鄉人每以驗晴
雨經建炎煨燼聲弗逮初開禧邊帥畢再遇於淮泗獲
景靈舊鐘漕臣黃瑩求寘之大滌亦既舁止然物久則
敝剝極宜復其革故鼎新必須應時數邇者宸命既頒
幣出內帑工擇國良賜度牒以資其費融兼金以美其質
衆橐一鼓大器立就其形不侈不弇不厚不薄其聲不

石不播不祚不鬱鐘成樓亦加肆殆時數之偶歟近臣
劉世亨承命庀事畫宣勞圖形以進天顏闔懌猗歟
盛哉聖天子嘉惠名山與先朝賜田臨幸匹休於無窮
矣夫形而上者謂之道形而下者謂之器鐘器也而道
寓焉倘能因器以求道則銷去鑛錯保合粹和內明外
寂力到功深窮遠徑於華陽侍宸遊於月殿服猛獸於
岩前藏金丹於箬下自然山川呈獻神物荐休鳳鳴高
岡龍蛻幽穴清泉沸井祥光燭天所謂地靈人傑豈昔

有而今無邪無已則澄神寡慾體道修真庶幾善人以
多嘉祥自應雨可請暘可祈尚無負於清朝欽崇之意
乃若聽考擊於晨暮昭報稱於薰修祝聖壽而保皇圖
與洞天福地同其長久者又不待言喻也朝議大夫權
尚書刑部侍郎兼同修國史實錄院同修撰兼侍講曹
叔遠撰并書朝奉郎行祕書郎兼吳王益王府教授池
聖夫題蓋拱衛大夫保康軍承宣使入內侍省副都
知兼國史實錄院都大提舉諸司主管講筵所主管往

來國信所同提點皇城司提點資善堂提點內軍器庫
所提領延祥觀兼提舉洞霄宮昊天殿祥符縣開國子
食邑五百戶劉世亨奉旨監鑄同知宮事胡道樞知宮
事王大年特賜冲妙大師住持都監兼主管昊天殿焚
修龔大明立石

檀越施田記

洞霄距行闕三舍而近翠華臨幸舊德典領延綏寺貂
崇禱旁午望出璇臺珍館之右星冠羽衣來游來處常

不翅數百千指九霞八景晴霏濕翠朝攬夕挹充然自得而主其徒者每皇皇懼無鞅數衆之弗克贍唐中葉嘗賜觀莊田一所國初錢氏籍以歸有司祥符中賜仁和田十有五頃除其租紹興初通明殿於宮之東偏又歲有常餼以給齋祭列聖涵育之恩至矣賜田中更多故僅存硤瘠歲入不足支數月都監宮事龔大明語其徒王思明王大年前是住山潘君三華尚能斥橐裝買曹槁田以繼粟吾徒可坐睨寬鄉上腴大家腐陳丐彼

有餘補吾不足庶幾我疇我耕我庾我積以裕我後之人
怡聲勸相堅力經度其志卒以酬畏壘既壞姑射且
熟鼓腹昇平稽首萬壽欲與是山相爲無窮來諗余爲
記夫道行乎天地之間日用飲食何者非道先王以是
生養天下一夫授田百畝于耜菜場有其時糾笠趙鎛
有其具堅好穎粟舂揄釋蒸有其成墻屋有桑疆畦有
果蔕柵有雞豚沼有魚鱉身勤於所養心安於所止一
毫無待於人此王道所以爲盛也世降道裂食非其力

者所在皆是而爲老氏之學者以清淨無爲爲宗須於人者挾雖名山藏室大洞殊庭號稱海內之望亦往往微常產以自殖其教然也於其教清淨無爲之中而能謀長以殖其衆可不謂難乎雖然樂與餌過客止道澹乎其無味視之不可見聽之不可聞而用之不可既爾師之說然也繼今不以口體爲心害宜有進乎澹而無味者余家天目之陽去天柱爲近間嘗分半席叩之施者生有祈死有荐其姓氏畝石並附見碑陰云寶慶元

年三月旦日朝奉郎行祕書郎洪咨夔記并書朝散郎
將作少監兼權禮部郎官兼魏惠憲王府教授鍾震題
蓋知宮事王大年冲妙大師住持都監龔大明立石

演教堂記

盤古開闢宇宙天先成而地後定故都天之號柱於八
極者三不周以北存而勿論可也惟瀟山之東杭山之
南積氣溫厚有雙柱峙焉以其上通太微之室故曰洞
天以其中伏三辰之根故曰天柱道家者流好言天與

帝而不以地對蓋維持主宰者在上地不過承之而已
洞霄舊號天柱觀而演教堂則又接天柱之乳而流出
道德者也先是堂列大門外傳者曰神營化造不類目
巧之室殆未可知也後遭兵燬更創於正殿後紹興肇
其迹開禧與其字端平又峻其基室虛而白楹廣而閒
雌霓抱梁陽鳥承檐堂之背疊石作巘曰聚仙亭翼步
欄而上曰方丈室耽耽乎廣廈真可談混元論黃虞矣
矧惟我高宗皇帝曾手書度人經以鎮清真之場孝宗

皇帝御製古澗松詩以尊不老之道玉宇扁於寧考金
錢錫於慈皇今主上又勅命冲妙師大明董集斯事列
聖修道崇教何其盛也堂甫成大明羽化而師孫處道
與監宮大年及大欽述師之志綜其本末求記於潼川
吳泳泳曰汝知所謂堂者因教而有堂邪所謂教者因
堂而有教邪向者堂弊教亦弊邪今者堂新教亦新邪
吾與子言堂有成壞而教無新故仙聖之所重惟教耳
然聖人以身教也真人以神聽也以身教故不悅道之

華以神聽故不逐言之迹今營一畝之宮築環堵之室
既勤樸斲又塗墍茨輪焉奐焉惟欲其美而身有玉廬
心有絳宮脾有黃室肺有皓庭面有赤宅耳有三門喉
有十二樓兩眉有紫戶青房七竅有金闕玉鑰皆自己
之堂也而不能媿也指三洞十二部爲教母綜五筭七
千笈爲道樞勃勃旋於珠口團團走於環中便以口之
所授爲深妙耳之所聞爲證真而自有此山以來陰陽
之浸昏曉之割日月之相斛雲雷之相盪飄風暴雨卒

斂於無彫煙鏤霞復歸於朴鳥啼而林幽則動中有靜
龍蟄而霧滃則寂中有感變通而爲四序流形而爲品
物不宰之宰不神之神皆自然之教也而莫之悟也處
道曰若爾吾記則歷劫以至於今千聖之戶庭荒矣雖
然吾復爲子通之老氏之學根以清淨虛明行以慈儉
忠孝其無爲也無不爲也近於易不爭也莫之爭也近
於謨谷神之說近於虛受嬰兒之喻近於若保修養而
引年近於祈天永命真誥謂性與道合由道之體近於

中庸王子謂一氣孔神於中夜存近於孟子若夫淮南
原道之極至於和與性使父無喪子之憂兄無哭弟之
哀童子不孤婦人不孀獸胎不殯鳥卵不殍則又吾孔
門家法也作是堂已玉眸詵詵豈無望道而欲見者倘
能味法如蜜調心如絃滌神識如鏡爲善無近名爲學
不躡等雖有拱壁駟馬不能易吾進道之心則聖真在
已不必問鄰矣霞子研之哉雲孫瑩之哉淳祐三年七
月既望寶章閣學士朝請大夫提舉隆興府玉隆萬壽

宮中江縣開國子食邑六百戶賜紫金魚袋吳泳記端
明殿學士朝請大夫同簽書樞密院事同提舉編修經
武要畧黃巖縣開國伯食邑九百戶食實封三百戶賜
紫金魚袋杜範書端明殿學士宣奉大夫簽書樞密院
事兼權參知政事同提舉編修經武要畧同提舉編修
勅令臨邛縣開國侯食邑一千五百戶食實封三百戶
賜紫金魚袋高定子篆蓋靈濟大師同知宮事孫處道
靈一大師知宮事貝大欽冲素大師住持都監兼通明

殿焚修王大年立石

東陽樓記

余曩登平都山訪濂溪周子舊遊亂碑中得小片周子
題兩絕句點畫勁正猶存溫厲之氣官合陽時筆也其
一詠陰仙丹訣云始觀丹訣信希夷蓋得陰陽造化機
子自母生能致立精神合後更知微又從山人得觀
丹訣一篇二十年間往來於心未忘也先墓在餘杭廬
居山中數遊洞霄道藏寫本甚真山廬無事時得假借

無何閱之徧則知丹訣所云周子一言蔽之矣宮殿都
監貝其姓大欽其名餘杭人賜號靈一作小樓寮中不
侈不約可詩可觴愛其翼然於塵外也與客造焉請名
適朝陽出高崗之上因作東陽樓三字遺之摘陰仙訣
中語也今又十餘年矣丹訣則已忘之唯周子詩中之
意炯然心目靈山之孫守一囑如圭來言曰靈一年八
十六而卒願得向者名樓之義以發其幽光余曰乾元
陽神吾資以始坤元陰精吾資以生元一也而分二體

於是有尊卑有貴賤以尊卑言則先乾而後坤尊當在先也以貴賤言則先陰而後陽貴當居後也既有先後則有嗑有睽有同有訟不得而齊焉不齊則離離去爲變相保則合合爲大和物生於和死於變精神合一即日月合一日月合一即乾坤之元復爲一此天地之正道萬物之公理聖人以是制爲禮樂達之天下禮無往而不來樂無進而不返斯道也在人或識其大或識其小未嘗墜也周衰道微四代禮樂之數掌於柱下史乃或

取之以養其生雖然禮樂者大和之器也所以建天地
溥萬物非有我之所得私也私之者小之也知廣而充
之則大矣是故一物有盡而萬物無終一身有終而萬
人無盡萬人無盡即我之無盡矣又何人已之分靈一
以壽終矣四海之內一視而同其未死者皆靈一也不
與天地同長久乎平都煙塵蒼莽石刻之存者幾希由
是以志諸洞霄尚不泯乎儒先之遺意不亦可哉咸淳
元年中春資政殿學士宣奉大夫眉山楊棟記并書光

祿大夫參知政事姚希得篆蓋

洞霄宮莊田記

鼎著養賢之象凡學先王之道者皆有養也自釋氏老子之教興學其學者莫不待養於公上豐其廬擬於校庠序食其人優於俊造秀是於古養賢之義合乎否邪老子之道黃帝之道也義黃繼天立極肇明倫紀循天理之自然以爲教因人心之本然以爲治無爲而無不爲也老子生於周之叔世覩當時文弊之極思返之淳

古之上故其爲教本禮而尚德其爲學務主靜守一以求之於內要其成就合於聖人誠之無爲非詭流俗以自異者也自漢人以黃老名家儒者病之至於今以異端見稱夫豈知黃帝之道傳爲老子之學與堯舜同稱之異端過矣我理皇游情六藝傍通百家之書嘗有契於神清之旨故遇老氏獨厚爲其近於儒也洞霄爲天下第一自祥符已有錫田淳祐間上特出內府度道士牒賜本宮俾易爲緡益市常產以裨贍用之乏奎畫昭

回焜耀於九鎖之下住山孫君處道仰承天寵治田義興之野罄已資合羣力經度土功再更寒暑疆畝乃備則常豐莊是也寶祐間尋被特旨撥賜長興田之在荻川者孫君復率其徒墾闢荒穢久乃就緒而朝命有嚴俾歸其產於蒲澤之暴更以烏程歸安二縣官田申錫本宮後先五年重施程績費用億秭乃克登粟我庾以潰於成則萬年莊是也杭人相與言昔歲資儲屢空宮衆百數弗克贍自二莊既成羽衣黃冠之士來游來歌

不遠千里食者倍蓰於昔而資用不竭是雖上恩衣被而孫君師弟子堅苦不倦瘠已裕人其功不可沒也叶贊其事則有王君大年貝君大欽皆龐眉皓首年八九十道岸蕭散與孫君為山中三老松間石上人望而見者以為神仙人予猶及識之今皆衰謝其所建置成就自當與此山相為不朽住山郎公道一慨孫君創締之艱勤求鉉翁為之記俾後有考謹不敢辭然念聖人之養賢與賢者之自為養實交致而並舉上遇老氏甚厚

學為老氏者當知所以自養食焉而思知其學所以同
於堯舜毋以異端自處而以聖道自期夫然後無負聖
皇尊禮老氏之意云咸淳九年六月吉日朝奉大夫直
寶謨閣知鎮江軍府兼管內勸農營田事節制軍馬家
鉉翁記朝議大夫軍器監兼左曹郎中劉叔子書宣教
郎守祕書省著作佐郎兼權樞密院編修官兼權右侍
郎官兼崇政殿說書余安裕題蓋輔教大師同知宮事
吳處仁凝神大師知宮事朱特立通妙大師住持都監

兼通明殿焚修郎道一立石

棲真洞神光記

紹定辛卯孟夏郎官楊公彥瞻遊九鎖山幽岩邃谷無所不歷二十有一日至棲真洞登東西兩臺洞絕頂故有若華蓋者方舉火燭之忽神光發東臺上圓如滿月青白相半升華蓋而止火爲奪明良久乃散觀者驚異公顧問偕行羽衆是何祥邪思明對曰嘻二百二十餘年矣在祥符間國家崇尚玄教漵漑使陳文惠公率官

屬有禱於大滌洞維時洞中出現是光照耀林麓文惠公表奏朝廷詔旨褒嘉始改洞霄宮額而扁亭祥光爲一代盛典方今立教之盛不異祥符公以勲舊子孫歷官郎署名位德望豈出文惠公下兩洞神光皆有爲而發非偶然者公憮然曰予何人敢望文惠公哉休徵之來偶相符契然不敢上負洞天之靈乃捐金買田若干以助齋庖以答神貺嗚呼洞天自漢元封彰神顯異何代無之謹以身所親見感動當世者刻著於石使來者

有攷且無忘楊公之德公名伯岳彥瞻其字和武恭王
孫好善忘勢不異儒家子時有東臺仙子許參玄滿月
光明現大千句留題山中紹定五年夏至日當山道士
元素大師王思明記同知宮事胡道樞知宮事王大年
冲妙大師住持都監兼通明殿焚修龔大明立石

冲天觀記

洞霄知宮靈濟通真大師孫處道興起宮事既勤既備
廼卜基於安吉之青坡初作上清道院都監演教大師

龔文煥式克肯堂拓舊而新殿無整比丹碧爰業復以
冲天觀勅額請於朝既又獲省符視御前宮觀悉免科
役俾其徒周允和主之遂爲茗雪間一大奇觀乃介王
道州有謁文於予予聞吳興號水晶宮其山川清曠宜
有高人逸士如昔者桑苧翁玄真子之徒往往猶未見
也二君經始棟宇以崇其教以淑其徒或者前所謂高
人逸士庶幾其亦來游乎道家者流其初出於傲世矯
俗老莊列子是已司馬父子始推儒者納諸博而寡要

勞而少功不曰堯舜道心孔曾道學固儒者所謂道也然而章句爲工青紫爲志專門名家甲詆乙排子長誠漢人也知漢儒而已今天下儒道之盛彰彰明矣視國事猶家視人猶己視孫君龔君之皇皇懇懇方洞霄整辦之餘又爲冲天開山焦心勞身無所爲而爲之者其幾何人漢儒其又可訾邪此之不爲而彼之有立予所爲慨焉寤嘆也使二君而歸於儒其亦能有立邪因爲之歌以訊之噫胡爲兮山水幽青坡上下兮苔雪交流

芙蓉衣兮蘭珮青精爲飯兮瓊糜爲羞致虛極兮靜篤
眇外物兮焉求澹和風兮扇春嘯壁月兮皓秋八極兮
一息神光爛兮斗牛歷萬劫兮不泯遺天下兮忘憂飛
仙兮何許慈憇兮虛柔定非閑固兮絕物私一已兮身
謀天門兮虎符上帝有命兮汎掃九州時清平兮可仕
招隱君兮毋彼留咸淳九年癸酉歲上巳日承事郎祕
書省校書郎兼權樞密院編修官兼崇政殿說書余安
裕記中奉大夫新除起居郎兼國史院編修官實錄院

檢討官文復之書中大夫權尚書工部侍郎兼同修國
史實錄院同修撰兼侍講高斯得篆額養素大師監觀
沈多福廣妙大師同知觀事周國壽輔元大師知觀事
張真嗣妙有大師開山住持管轄周允和立石

洞晨觀記

餘杭洞晨觀蓋洞霄宮流派也前面玉几側挾安樂山
茗溪支港環出其後故爲邑人陳季卿居傳記所載季
卿遇終南山仙翁以竹葉爲舟者洞霄宮都監貝靈一

得而愛之開建觀宇凡殿閣堂廡庖湑諸舍色色具備
風瓢雨笠來游來居咸得其所歲癸亥請於禮部錫今
額命其徒貝守一開山主領自甲而乙徐應庚繼之端
明洪公燾尹京復為表奏視本宮古例悉免科役迨今
三傳矣塗墍丹雘歲有增益迄為名山先是靈一以餘
杭至洞霄十有八里山路嶮巇行者以為病乃捐已貲
築塘甃石闢成坦塗車馬之往來便之復營接待使有
息肩地用心可謂仁矣謹按東南名山若句曲武夷桐

栢之魁岸奇秀皆諸宮觀羅列形勝各有所分無得專
美而洞霄發源天目蘊為洞天福地大滌天柱諸山所
融結環抱者止於一區故其源深流長本大枝茂若宮
若觀若道院支分派別遠近咸有羽流之盛足擬一中
郡國家優異恩數非他處敢望主席必循序遷不得僥
倖有得至焉亦皆老成重厚深閱世故者是以玄風日
振代不乏人靈一往矣行路稱思其功所謂死而不亡
者哉靈一蓋穆陵賜號其名大欽咸淳甲戌日南至朝

散郎尚書吏部員外郎兼權右司華陽宇文十朋記并
書寶謨閣直學士中奉大夫知慶元府松海制置使主
管勸農使龍泉縣開國男食邑三百戶陳存篆蓋元素
大師知觀事陳敬雷靖逸大師管轄住持觀事貝如圭
立石

洞霄宮昊天殿上梁文

上穹昭格端景命於皇朝時御溥臨迓殊祥於福地爰
體清都之制肆承法展之光惟天柱之一峯閔仙家於

九鎖韶奏下雲霄之響真游仰鸞鶴之翔夙高淸淨之
風茲劇欽崇之典用榮輪奐以傳休明恭惟今上皇帝
陛下德駿道隆功成治定珍符時介荷顯錫於蒼規至
養日崇罄宸誠於天閭皇太后殿下裊身勤約造道精
微省法宮玉食之榮嚴洞府璇儀之奉皇后殿下肅端
坤厚光配乾純躬淑則以欽承履柔謙而昭事今則庶
工雲集華締將周協和氣以氤氲擁歡聲而雜還綠槐
丹桂分霽色於仙班瓊鉞霓旌候祥飈於紫闥願形善

頌式舉修梁 東一派寒泉九鎖通夜半風回知帝力
仙巖留得翠玲瓏 西洞口祥風跨紫霓千里華陽通
閔道紅葩碧草映輪蹄 南天柱峯高擁翠嵐陞舞胎
仙聞撫掌跳珠濺壁起澄潭 北大滌洞宮天北極中
有真人養聖胎霜壇夜窈神仙域 上麗日瞳矐浮曉
望朝退羣仙輦路寒迢迢碧落開重嶂 下苔水縈回
周四野瑞木重榮綠蔭高金鞭玉轡來風馬 伏願上
梁以後福萃清躬慶扶亨運震承離繼昌聖壽於緜緜

地久天長奉慈闈於永永答時邁高明之眷藹思齊雖
肅之音凡我含生齊歸洪造紹興二十五年八月石室
隱士陸維之撰

演教堂揭扁法語

洞霄大滌扈神京玉珮金璫會百靈天柱一尖凌碧落
雲闕九鎖疊蒼屏前峯後峯煙漠漠東洞西洞風泠泠
見說坡仙詩墨在約君同坐翠蛟亭客入洞門清涵山
骨寒層青未了古洞綠依然瀑布泉邊玉葉風摩千歲

草雲根石畔金莖露浥萬年芝我將喚起閭丘玄同而
更相招司馬承禎左攀郭文舉右拍許遠游陟天壇訪
石室入藥圃謁草堂同登來賢岩去尋無骨箬萬杉鎖
斷紅塵影三逕寒凝碧蘚斑竇風雷飛伏之都乃龍神
校閱之所所以翠華南幸有嚴香火之欽崇紫館西戢
以待公召之均逸昔有金龍玉簡之典今存青詞朱表
之儀列聖所共留神當今尤甚加禮今之日風和鸞喜
水暖花香奉使國師寧國侍晨真人面承綸旨大滌藏

真都錄管轄上官侍晨鑒義知宮馮君隨弼颺乘協翊
天馨來止仙都適丁盛事歲在丁丑宸翰演教堂三大
字以賜住山冲妙大師龔大明越今五春方圓扁揭可
謂鳳翥龍翔蛟騰虎躍奎躔璀璨雲漢昭回有茲鐵畫
銀鈎宣示金填玉鏤光映草木榮溢煙霞以吾教之當
興與名山之不朽方玉燭應天之日政真金演教之時
頃者山中慶成法堂獲此御墨雲霓煙栢上跨寒空月
礎星磚妙為法窟何異騫林之境宜安玉局之床闡三

洞四輔之微敷八極九清之妙此碑既揭日月同明此
話不誣人天乎照大衆且道掲碑一句如何讚祝 九
峯雲靜仁天廣 五洞風清化日長 嘉定十年辛巳
三月道士白玉蟾撰

舊真境錄後序

右大滌真境錄道士唐子霞撰予借觀愛其善叙事而
知宮金凝妙副宮吳觀妙諉予是正予頗附益以所遺
而郭文舉遺跡徧於三邑吳正節煉度於西麓期限應

啓閭丘君正容以悟物使羅隱卒保終吉皆予特表發之庶得為全書然予觀茅山晉宋以前流傳蓋寡自陶公游之以為欲界之仙都又得楊許衆真遺墨撰次真誥而山之神蘊皆露故使人望之則易仙童初太元之府彷彿在目自餘洞天猶寂寂也今唐子所識既勤且博矣而金堂玉室官府曲折猶恨未備昔王逸少嘗記許遠遊之言以為傳頗開其端矣蓋自此地而南達於山陰想像其間若扉礪戶得道不死者接迹而洞臺便

開神真游處宜有巨麗駭目洞心之觀過三茅遠矣建安中左元放齋戒三月入華陽洞周旋其中經年而出嘆曰不圖天下復有如此之異然茅山之顯卒因陶公而不因元放也世傳閭丘君入大滌從華陽而歸亦止稱其異而不著之於書大凡得游履者心知而不言世之欲傳者又未嘗得游而難言故洞天之境率多晦而少顯勿遂謂羽褐無人也倘幽人勝士追踪左許閭丘之逸軌足殊庭而目仙子者幸無惜詳言之使此境盡

露此書大備而學道希生者從而勉勵焉亦至人之用心也宣和五年四月餘杭縣丞吳興成無玷序



洞霄圖志卷六

跋

天地氣鍾江山靈炳述紀所由者爛然星陳迷軒轅駕
期汗漫遊何人躬接茲賞大滌洞天自漢來世名牋錄
道顯玄元棲真北谷之士執青節駐鶴裝德不泯絕歷
歲既久不能縷緝住山介石終日乾乾定為洞霄志委
心雲孫孟集虛攀迷途顧中峯漸磨成集宿心遂矣便
便夸毗之子悠悠白頭名利盛衰之感咄咄誰曷由纂
懿流光於斯為盛肯堂肯播弗棄基矣後之人後之人

不越印教不亦宜乎大德乙巳冬至前三日大滌隱人
錢塘本山葉林儒藻父謹跋

十洲有志存而勿論可也如洞天福地固在職方之內
而雲笈之書不過舉其凡目或間見於郡國圖誌又語
而不詳其瑰偉之觀靈異之蹟湮沒於雲煙縹緲林麓
莽蒼間者何限亦博物洽聞之士所病也況大滌之境
為東南最集虛孟尊師患紀載之闕承師命撰洞霄圖
志俯仰採拾彙成六卷語詳事核而大滌之勝於是乎

大備余竊讀而有感焉茲山自東晉而名漸著往往皆
遺世絕俗者於焉逍遙迨宋中葉而後琳庭瓊館始聳
嶭甲于一方而主領茲山者亦名秩便蕃矣今又際遇
國朝崇獎玄教龍光赫奕其聲華氣緊視昔日為尤盛
然而昔之所謂霞舉之流顧迺淵潛而不露何耶豈果
山川風水旋轉有時耶抑亦神仙混跡人間固未易識
也當俟暇日青鞋布襪往扣雲扃試酌蛟亭之水酌山
靈而問之上章閣茂中元台李洧孫跋

